

Augsburg, 15. Oktober 1558

An Wolfgang Musculus

Stadtbibliothek Zofingen, Pa 14/1, Nr. 180.

Abschriften: Zentralbibliothek Zürich, Ms. S. 93, Nr. 83; UB Basel, G I 68, fol. 201v-202r.

Deutsche Paraphrase: Staatsarchiv Aarau, Abt. Nachlässe: J. M. Schuler [BNQ 32(6)].

S. P. D. Postridie eius diei, vir doctissime et humanissime, quam a me discesseras, accepi responsum a consule quodam huius vrbis, viro mihi amicissimo, quod non quidem omnem mihi scrupulum eximeret, (suas enim coniecturas, non publicam autoritatem afferebat) sed tamen dubitationem meam nonnihil lenaret. Aiebat enim, se neminem qui in magistratu esset, de me conquerentem audiuisse, complures verò, qui me, exacto quinquennio meo, diutius in hac vrbe, modò vellem, retinendum censere. Quod si ita est, vt fortassis est: profectò vides, hanc qualemcumque fortunam, mihi non esse amittendam. Lausanna fortassis essem honoratior, et de pluribus bene mereri possem, et doctorum consuetudine et erudirer et delectarer. Sed cum Deus in obscuro hoc et a discipulis ferè deserto scholae nostrae angulo delitescere me voluerit: committendum non videtur, vt stationem hanc deseram. Sicut igitur Magnifici atque amplissimi senatus Bernensis beneficio et liberalitate vti non possum hoc tempore: ita mihi iucundissimum est, tantorum virorum tam honorificum de me iudicium, idqüe vti conseruent et augeant, pro virili mea elaborabo. Tibi autem quantum debeam, agnoscere facilius, quam effari possum. Nam tui sermones occasionem mihi dederunt tentandi voluntates magistratum nostrorum, et animum pro<pter> iniqua de nostris studijs hominum iudicia vacillantem confirmarunt. Multis verbis vti neque soleo neque possum, et perspectam tibi esse εὐήθεια<ν> meam non dubito. illud persuasum habere te velim, si quid sit, in quo tuis commodis seruire possim, me et libenter et summo studio facturum esse. Vale. Augustae Vindelicorum. Idibus Octobris 1558.

Hiero[nymus] Wolfius.